

# Ai ceidwad fy mrawd ydwyf i?

*“Safodd Iesu, a dywedodd: ‘Galwch arno.’ A dyma hwy’n galw ar y dyn dall ac yn dweud wrtho, ‘Cod dy galon a saf ar dy draed; y mae’n galw arnat.’”*  
(adn. 49)

## Beth am ddarllen Marc 10:46–52 ac yna myfyrio

Bu i ni ddweud ychydig ddiwrnodau yn ôl bod angen i’r Cristion ymdeimlo ag angen pob dyn. Roedd Iesu yn sensitif i angen unigolion, ac os ydym am ei ddilyn ef, rhaid i ni astudio ei esiampl. Heddiw, clywn sut bu i Bartimeus alw ar Iesu: “Fab Dafydd, trugarha wrthyf” (adn.48). Dywedodd y bobl o’i amgylch wrtho am dewi. Er hynny, clywodd Iesu ef yn galw dro ar ôl tro, ac felly, trodd gan orchymyn; “Galwch arno.” Yna, bu rhai oedd wedi bod yn ei annog i dewi rithro at y dyn, gan ddweud: “Cod dy galon. Saf ar dy draed. Mae’n galw arnat.” Wedi i Iesu ddangos diddordeb yn y cardodyn yma, bu i’r dyrfa oedd gynt yn ei anwybyddu ddechrau cymryd diddordeb ynddo. Er nad wyf am awgrymu fod diddordeb y dyrfa yn y dyn dall yr un diddordeb ag oedd gan Iesu, yr wyf am awgrymu y dylem arddangos yr un gofal ag y bu i Iesu ei arddangos. Rhaid i ni ymdeimlo ag angen a bod yn sensitif i angen.

Bu i mi gynghori Cristion ychydig flynyddoedd yn ôl oedd mewn anawsterau. Wedi i ni siarad, awgrymais fod Duw wedi ei gynorthwyo ac y dylai ei roi ei hun i gynorthwyo eraill. Awgrymais un neu ddwy o ffyrdd iddo gyflawni hyn, gan nodi rhai pobl fyddai mewn sefyllfa i’w gyfarwyddo. Ond wedi i mi ddisgrifio eu hamgylchiadau, trodd ataf a dweud: “Dydw i’n poeni dim.” Er fy mod dros y blynyddoedd wedi clywed credinwyr yn dweud pethau anghristnogol iawn, mae’n rhaid i mi gyfaddef fod ei eiriau wedi torri fel cylllell drwy fy nghalon. Sut all dilynwr i Iesu Grist ddweud hyn? Wrth gwrs, ni fu’r gŵr yma yn hir cyn mynd i anawsterau eto, anawsterau o’i wneuthuriad ei hunan. Nid oedd yn poeni am neb, ac oherwydd ei ddiffyg gofal methodd â dod i delerau â’i fywyd ei hun.

## Beth am fynd ymlaen i ddarllen:

Math. 18:21–35; Heb.13:1–3; 1 Ioan 3:1–19

## Meddyliwch am y cwestiynau hyn:

1. Sut y mae ein hagwedd at bobl eraill yn arddangos cyflwr ein henaid?
2. Beth yw’r berthynas rhwng cariad a gweithredoedd?

## Gweddi

O Dad, caniatâ na fydd i’r geiriau “ai ceidwad fy mrawd ydwyf i” gael eu clywed ar fy ngwefusau. Bydded i’r hyn sydd o ddiddordeb i’m Gwardwr fod o ddiddordeb i mi. Bydded i destunau ei ofal ef fod yn destunau fy ngofal i. Er mwyn ei enw annwyl. Amen.